

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj 7/10), Vlada Zeničko-dobojskog kantona, na prijedlog Ministarstva zdravstva, na 70. sjednici, održanoj dana 12.07.2012. godine, d o n o s i

ZAKLJUČAK

I.

Utvrđuje se Prijedlog Odluke o preuzimanju prava i obaveza osnivača i usklađivanju organizacije i poslovanja Javne ustanove Kantonalni zavod za javno zdravstvo.

II.

Prijedlog Odluke iz tačke I. ovog zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/12.
Datum, 12.07.2012. godine
Zenica

PREMIJER

mr.sci. Fikret Plevljak, dipl.ing.

DOSTAVLJENO:

1x Skupština Zeničko-dobojskog kantona,
1x Ministarstvo zdravstva,
1x a/a.

PRIJEDLOG

Na osnovu člana 6. Zakona o ustanovama („Službeni list R.BiH“, broj: 6/92, 8/93 i 13/94), člana 53. stav 4. i člana 234. Zakona o zdravstvenoj zaštiti („Službene novine F.BiH“, broj 46/10), Skupština Zeničko-dobojskog kantona, na ____ sjednici održanoj _____2012. godine, donijela je

ODLUKU

o preuzimanju prava i obaveza osnivača i usklađivanju organizacije i poslovanja Javne ustanove Kantonalni zavod za javno zdravstvo

I OPĆE ODREDBE

Član 1.

(Predmet)

Ovom odlukom Skupština Zeničko-dobojskog kantona (u daljem tekstu: Osnivač), preuzima prava i obaveze osnivača Javne ustanove Kantonalni zavod za javno zdravstvo, osnovan Zakonom o javnoj ustanovi Kantonalni zavod za javno zdravstvo („Službene novine Zeničko-dobojskog kantona“, broj: 11/97 i 2/98) i vrši usklađivanje organizacije rada i poslovanja Javne ustanove Kantonalni zavod za javno zdravstvo sa Zakonom o zdravstvenoj zaštiti („Službene novine F.BiH“, broj: 46/10).

II NAZIV I SJEDIŠTE

Član 2.

(Naziv i sjedište)

Javna ustanova Kantonalni zavod za javno zdravstvo nastavlja sa radom i poslovanjem pod promjenjenim nazivom koji glasi: „Javna ustanova zavod za javno zdravstvo Zeničko-dobojskog kantona“ (u daljem tekstu: Zavod).

Skraćeni naziv Zavoda je: „Kantonalni zavod za javno zdravstvo“.

Sjedište Zavoda je u Zenici, ulica Fra Ivana Jukića 2.

Član 3.

(Pravni status)

Zavod ima svojstvo pravnog lica i upisan je u sudski registar nadležnog Suda u Zenici.

Član 4.

(Djelatnost)

Zavod obavlja poslove utvrđene Odlukom o klasifikaciji djelatnosti Bosne i Hercegovine („Službeni glasnik BiH“, broj 47/10), koji obuhvata područja:

- a) 86.22 djelatnost specijalističke medicinske prakse,
- b) 86.90 ostale djelatnosti zdravstvene zaštite,
- c) 63.11 obrada podataka,
- d) 71.20 tehnička ispitivanja i analize.

U okviru djelatnosti iz stava 1. ovog člana, Zavod obavlja sljedeće poslove:

- predlaže programe zdravstvene zaštite iz oblasti djelokruga svog rada,

- provodi zdravstveno statistička istraživanja u svrhu praćenja, procjene i analize zdravstvenog stanja stanovništva, kao i organizacije rada zdravstvenih ustanova za područje kantona,

- prati, ocjenjuje i analizira zdravstveno stanje stanovništva, kao i organizaciju i rad zdravstvenih ustanova na području kantona,

- planira, organizuje i provodi aktivnosti promocije zdravlja i zdravstvenog odgoja stanovništva,

- učestvuje u planiranju, predlaganju i provođenju mjera za sprečavanje, rano otkrivanje i suzbijanje hroničnih masovnih bolesti, uključujući i bolesti ovisnosti,

- prati, analizira i ocjenjuje uticaj okoline i hrane na zdravstveno stanje stanovništva na području kantona, te predlaže mjere za unapređenje stanja u oblasti,

- provodi preventivnoodgojne mjere zdravstvene zaštite u osnovnim i srednjim školama, kao i fakultetima za područje kantona,

- koordinira, usklađuje i stručno povezuje rad zdravstvenih ustanova za područje kantona,

- kontinuirano provodi mjere higijensko-epidemiološke zaštite i nadzora sa epidemiološkom analizom stanja na području kantona i provodi protivepidemijske mjere, te nadzire provođenje obaveznih imunizacija,

- obavlja raspodjelu obaveznih vakcina zdravstvenim ustanovama na primarnom nivou zdravstvene zaštite na području kantona,

- nadzire provedbu mjera dezinfekcije, dezinsekcije i deratizacije, te provodi preventivne i protivepidemijske postupke dezinfekcije, dezinsekcije i deratizacije za područje kantona,

- obavlja sanitarnu hemijsku i sanitarno mikrobiološku dijagnostičku djelatnost,

- učestvuje u izradi i provedbi pojedinih programa zdravstvene zaštite u vanrednim prilikama,

- stručno-metodološki nadzire i usmjerava rad higijensko-epidemioloških službi na području kantona,

- saraduje sa drugim zdravstvenim ustanovama na području kantona, kao i sa nadležnim organima lokalne samouprave i drugim ustanovama i organizacijama od značaja za unapređenje javnog zdravlja.

Zavod za javno zdravstvo kantona, pored poslove iz stava 2. ovog člana, može obavljati i sljedeće poslove:

- planira, organizuje i provodi djelatnost kontinuirane medicinske edukacije i kontinuiranog profesionalnog razvoja u sektoru zdravstva,

- izrađuje, implementira i evaluiira projekte u oblasti zdravstva i zdravstvene zaštite,

- provodi obuku zaposlenih za sticanje osnovnih znanja o higijeni životnih namirnica i predmeta opšte upotrebe, kao i ličnoj higijeni lica koja rade u proizvodnji i prometu životnih namirnica i predmeta opšte upotrebe,

- obavlja hemijske, bakteriološke, serološke, toksikološke i virusološke preglede i ispitivanja u vezi sa proizvodnjom i prometom životnih namirnica, vode, vazduha, predmeta opšte upotrebe, kao i preglede u vezi sa dijagnostikom zaraznih i nezaraznih bolesti,

- ispituje zdravstvenu ispravnost vode za piće, vode za dijalizu, vode za rekreaciju, površinske i otpadne vode, stanje vodoopskrbe, te zdravstvenu ispravnost životnih namirnica i predmeta opšte upotrebe,

- provodi mjere dezinfekcije, dezinsekcije i deratizacije,
- predlaže i provodi aktivnosti na unapređenju sistema zdravstvene sigurnosti proizvodnje i prometa životnih namirnica, vode i predmeta opšte upotrebe u cilju smanjenja rizika od obolijevanja i drugih štetnih posljedica po zdravlje,
- provodi zdravstveni nadzor nad kliconošama, zaposlenim i drugim licima u skladu sa propisima o zaštiti stanovništva od zaraznih bolesti,
- daje stručno mišljenje o opravdanosti osnivanja, proširenja, promjene ili prestanka rada zdravstvene ustanove saglasno čl. 56. 58. i 60. ovog zakona,
- vrši sanitarne preglede zaposlenih koji se obavezno sprovode radi zaštite stanovništva od zaraznih bolesti, zaštite potrošača, odnosno korisnika,
- učestvuje u sprovođenju vanjske provjere kvaliteta stručnog rada u drugim zdravstvenim ustanovama i privatnoj praksi,
- bavi se izdavanjem raznih oblika publikacija iz djelokruga svog rada,
- obavlja i druge poslove u skladu sa zakonom.

Član 5.

(Ovlaštenja u pravnom prometu)

Zavod u pravnom prometu sa trećim licima istupa kao jedinstveni pravni subjekt u svoje ime i za svoj račun, bez ograničenja u okviru svoje djelatnosti.

Član 6.

(Statusne promjene)

Zavod može proširiti ili promijeniti djelatnost i vršiti statusne promjene: spajanja, pripajanja, podjele i izdvajanja.

Odluku iz stava 1. ovog člana donosi osnivač.

III IZVOR I NAČIN OBEZBJEĐIVANJA SREDSTAVA ZA RAD I NAČIN RASPOLAGANJA VIŠKOM PRIHODA NAD RASHODIMA

Član 7.

(Sticanje sredstva za rad)

Sredstva za rad Zavod ostvaruje:

- ugovorom sa Zavodom zdravstvenog osiguranja kantona,
- ugovorom sa ministarstvom zdravstva,
- ugovorom sa fakultetima i drugim visokim školama zdravstvenog usmjerenja,
- ugovorom po osnovu proširenog i dobrovoljnog zdravstvenog osiguranja iz sredstava osnivača u skladu sa zakonom,
- iz budžeta federacije, kantona, odnosno općine,
- iz učešća korisnika zdravstvene zaštite u pokriću dijela ili ukupnih troškova zdravstvene zaštite,
- slobodnom prodajom usluga na tržištu,
- iz drugih izvora na način i pod uslovima određenim zakonom, aktom o osnivanju i statutom Zavoda.

Član 8.

(Raspodaganje prihodima i rashodima)

Višak prihoda nad rashodima Zavod koristi za obnavljanje i razvoj djelatnosti.

IV MEĐUSOBNA PRAVA I OBAVEZE IZMEĐU OSNIVAČA I USTANOVA

Član 9.

(Odgovornost za obaveze)

Za svoje obaveze Zavod odgovara sredstvima sa kojima raspolaže.
Kanton ne odgovara za obaveze Zavoda.

Član 10.

(Saglasnost osnivača)

Statut i pravilnik o unutrašnjoj organizaciji i sistematizaciji Zavoda podliježe obaveznoj saglasnosti osnivača.

Saglasnost na akte iz stava 1. ovog člana u ime osnivača daje Vlada kantona.

V UPRAVLJANJE I RUKOVOĐENJE

Član 11.

(Upravljanje)

Organ upravljanja Zavodom je upravni odbor.

Upravni odbor ima predsjednika i četiri (4) člana i čine ga predstavnici:

- osnivača – tri (3) člana, od kojih jedan (1) mora biti ispred kantonalnog ministarstva,
- stručnih radnika Zavoda - dva (2) člana, od kojih jedan (1) mora biti iz reda zdravstvenih radnika.

Predsjednika i članove upravnog odbora imenuje i razrješava Vlada kantona, na prijedlog kantonalnog ministra, po postupku i na način utvrđen Zakonom o ministarskim, vladinim i drugim imenovanjima („Službene novine F.BiH“, broj: 12/03 i 34/03).

Mandat upravnog odbora traje četiri godine.

Član 12.

(Djelokrug rada)

Upravni odbor Zavoda obavlja sljedeće poslove:

- donosi statut Zavoda,
- imenuje i razrješava direktora, odnosno vršioca dužnosti direktora,
- utvrđuje godišnji program rada,
- donosi finansijski plan i usvaja godišnji obračun,
- donosi opšta akta o unutrašnjem uređenju i sistematizaciji poslova i drugih opštih akata, saglasno zakonu i statutu,
- odlučuje o svim pitanjima obavljanja djelatnosti radi kojih je Zavod osnovan, ako zakonom nije određeno da o određenim pitanjima odlučuje drugi organi Zavoda,
- usmjerava, kontroliše i ocijenjuje rad direktora,
- rješava sva pitanja odnosa s osnivačem,
- odlučuje o korištenju sredstava preko iznosa utvrđenog statutom Zavoda ,
- odgovara osnivaču za rezultate rada i poslovanja,
- podnosi osnivaču najmanje jedanput godišnje izvještaj o poslovanju,
- obavlja i druge poslove saglasno zakonu i statutu Zavoda.

Član 13.
(Rukovođenje)

Organ rukovođenja Zavodom je direktor.

Direktora Zavoda imenuje i razrješava upravni odbor na osnovu javnog konkursa, uz prethodnu saglasnost kantonalnog ministra.

Direktor organizuje i rukovodi radom Zavoda, zastupa i predstavlja Zavod prema trećim licima i odgovoran je za stručni rad i zakonitost rada. Direktor obavlja i druge poslove utvrđene zakonom i statutom Zavoda.

Direktor podnosi upravnom odboru jednom tromjesečno izvještaj o cjelokupnom poslovanju Zavoda.

Direktor učestvuje u radu upravnog odbora bez prava odlučivanja.

Mandat direktora traje četiri godine.

Član 14.
(Statut)

Osnovni opći akt Zavoda je statut.

Statutom Zavoda se uređuje:

- naziv i sjedište osnivača,
- naziv, sjedište i djelatnost Zavoda,
- izvori i način sticanja sredstava za rad,
- način raspolaganja viškom prihoda nad rashodima i način na koji se pokriva višak rashoda nad приходima,
- prava i obaveze osnivača u pogledu obavljanja djelatnosti zbog koje se zdravstvena ustanova osniva,
- međusobna prava i obaveze Zavoda i osnivača,
- stručna tijela Zavoda, mandat članova stručnih tijela, način izvora i finansiranja,
- imenovanje organa upravljanja i rukovođenja,
- rok za donošenje statuta, imenovanje direktora i organa upravljanja,
- druga pitanja od značaja za rad Zavoda.

Statut Zavoda podliježe obaveznoj saglasnosti osnivača.

Zavod donosi i druge opće akte u skladu sa zakonom, kolektivnim ugovorom i statutom Zavoda.

Član 15.
(Stručna tijela i komisije)

Stručna tijela i komisije Zavoda su:

- stručno vijeće,
- etički komitet,
- komisija za lijekove,
- komisija za poboljšanje kvaliteta i sigurnosti u zdravstvu,
- komisija za prigovore pacijenata.

Bliže odredbe o postupku imenovanja, sastavu, nadležnostima i načinu rada i odlučivanja stručnih tijela i komisija iz stava 1. ovog člana uređuju se statutom Zavoda.

VI PRELAZNE I ZAVRŠNE ODREDBE

Član 16.

(Imenovanje upravnog odbora i direktora)

Vlada kantona će u roku od 15 (petnaest) dana od dana stupanja na snagu ove odluke, privremeno na period utvrđen zakonom, imenovati upravni odbor i vršioca dužnosti direktora.

Član 17.

(Upis u sudski registar)

Vršilac dužnosti direktora Zavoda dužan je preduzeti sve potrebne radnje za upis u sudski registar promjena utvrđenih ovom odlukom.

Član 18.

(Donošenje statuta)

Upravni odbor Zavoda će u roku od 30 (trideset) dana od dana imenovanja donijeti statut Zavoda, a u roku od 60 (šezdeset) dana i druge opće akte iz svoje nadležnosti.

Član 19.

(Status imovine)

Zavod zadržava pravo korištenja državne imovine koju je koristio na dan stupanja na snagu ove odluke.

Član 20.

(Objavljivanje i stupanje na snagu)

Ova Odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: _____/12.
Zenica, _____ godine.

PREDSJEDAVAJUĆI

O b r a z l o ž e n j e

I. PRAVNI OSNOV

Pravni osnov za donošenje Odluke o preuzimanju prava i obaveza osnivača i usklađivanju organizacije i poslovanja Javne ustanove Kantonalni zavod za javno zdravstvo Zeničko-dobojskog kantona sadržan je u odredbama Zakona o ustanovama („Službeni list R.BiH“, broj: 6/92, 8/93 i 13/94), koji propisuje sadržaj osnivačkog akta (odluke o osnivanju) i člana 53. stav 4. Zakona o zdravstvenoj zaštiti („Službene novine F.BiH“, broj: 46/10), kojim je utvrđeno da kanton, pored ostalog, može biti osnivač Zavoda za javno zdravstvo.

II. RAZLOZI ZA DONOŠENJE

Zakonom o zdravstvenoj zaštiti u članu 234. stav 1. utvrđena je obaveza osnivača da u roku od 24 mjeseca od dana stupanja Zakona na snagu preuzmu osnivačka prava nad zdravstvenim ustanovama čiji su osnivači, odnosno usklade svoja osnivačka akta sa odredbama ovog Zakona.

Budući da ovaj rok ističe 10.08.2012. godine, neophodno je pristupiti donošenju nove odluke o osnivanju Javne ustanove zavod za javno zdravstvo, na osnovu koje će ova zdravstvena ustanova izvršiti usaglašavanje svojih opštih akata sa ovom Odlukom, kao i odredbama novog Zakona o zdravstvenoj zaštiti, te provesti odgovarajući postupak radi upisa promjena u Odluci o osnivanju Zavoda za javno zdravstvo.

III. OBRAZLOŽENJE PREDLOŽENIH PRAVNIH RJEŠENJA

U članu 1. ove odluke utvrđeno je da Skupština Zeničko-dobojskog kantona preuzima prava i obaveze osnivača Javne ustanove zavod za javno zdravstvo saglasno članu 234. Zakona o zdravstvenoj zaštiti, te da se odlukom vrši usklađivanje rada i poslovanja Zavoda sa Zakonom o zdravstvenoj zaštiti i drugim propisima iz ove oblasti.

Članom 2. utvrđeno je da Zavod nastavlja sa radom i obavljanjem zakonom utvrđene djelatnosti pod promjenjenim nazivom koji glasi: Javna ustanova zavod za javno zdravstvo kantona i utvrđeno sjedište ove zdravstvene ustanove, kao i njen skraćeni naziv.

Članom 3. propisano je da je Zavod upisan u registar kod nadležnog suda.

U članu 4. djelatnosti Zavoda usklađena je sa Odlukom o klasifikaciji djelatnosti Bosne i Hercegovine („Službeni glasnik BiH“, broj 47/10) i članom 119. Zakona o zdravstvenoj zaštiti kojim je utvrđen djelokrug rada Zavoda za javno zdravstvo.

Članovima 5. i 6. utvrđena su ovlaštenja u pravnom prometu i statusne promjene koje mogu biti: spajanja, pripajanja, podjele i izdvajanja Zavoda.

U članu 7. utvrđen je način sticanja sredstava za rad Zavoda koji je usklađen sa odredbama člana 62. Zakona o zdravstvenoj zaštiti.

U članu 8. propisan je način raspolaganja viškom prihoda nad rashodima.

Članom 9. utvrđena je odgovornost Zavoda za stvorene obaveze.

U članu 10. propisano je da statut i pravilnik o unutrašnjoj organizaciji podliježu saglasnosti osnivača koju u ime Skupštine daje Vlada kantona.

Radi se o novoj odredbi koja utvrđuje da umjesto Skupštine saglasnost na statut Zavoda daje Vlada. Pored toga novinu predstavlja i obaveza Zavoda da na pravilnik o unutrašnjoj organizaciji traži saglasnosti osnivača, čime se uspostavlja mehanizmi kontrole novog zapošljavanja u javnim zdravstvenim ustanovama u situacijama kada to i nije neophodno.

U članu 11. propisan je sastav upravnog odbora Zavoda, čime je sastav ovog organa usaglašen sa odredbama člana 64. stav 4. Zakona o zdravstvenoj zaštiti koji propisuje da upravni odbor, umjesto tri ima dva člana predstavnika osnivača, umjesto jednog, dva člana predstavnika Zavoda, od kojih jedan član mora biti iz reda zdravstvenih radnika Zavoda, dok je odredba o jednom članu ispred kantonalnog ministarstva ostala nepromijenjena.

U članu 12. propisan je djelokrug rada upravnog odbora usaglašen sa odredbama Zakona o zdravstvenoj zaštiti.

Članovima 13. propisan je način rukovođenja Zavodom, imenovanje i razrješenje direktora i njegova prava, obaveze i odgovornosti.

U članu 14. utvrđeno je da je statut osnovni opći akt Zavoda, te da se pored statuta u Zavodu donose i drugi opći akti u skladu sa statutom i drugim propisima.

U članu 15. propisana su stručna tijela i komisije Zavoda predviđene Zakonom o zdravstvenoj zaštiti i Zakonom o pravima, obavezama i odgovornostima pacijenata („Službene novine F BiH“, broj: 40/10).

U članu 16. utvrđena je obaveza i rokovi u kojima će se imenovati upravni odbor i vršilac dužnosti direktora Zavoda, privremeno, na period utvrđen zakonom.

Članom 17. utvrđena je obaveza direktora da izvrši sve potrebne radnje za upis promjena iz ove odluke u sudski registar.

U članu 18. utvrđeni su rokovi za donošenje statuta i drugih općih akata iz nadležnosti Zavoda.

Član 19. reguliše status državne imovine koju koristi Zavod, na način kako je to propisano u članu 223. Zakona o zdravstvenoj zaštiti.

U članu 20. utvrđen je prestanak važenja dosadašnjeg Zakona o osnivanju Zavoda.

Član 21. propisuje vrijeme stupanja na snagu odluke.

IV. FINANSIJSKA SREDSTVA

Za sprovođenje ove Odluke nisu potrebna dodatna finansijska sredstva.

MINISTARSTVO ZDRAVSTVA